

東
華
續
錄

東華續錄

同治九十二

臣王先謙敬編

臣張式恭恭校

冬十月戊午朔諭軍機大臣等張廷岳奏拏獲從逆人犯並賊匪竄擾情形一摺據獲賊供稱該匪在畢畱圖廟被官軍合圍賊勢已極窮蹙乃達爾濟輕率招降並自撤營壘縱令賊匪遠颺實屬罪無可追達爾濟前已降旨摘去頂帶著卽革職拏問交奎昌多布沁札木楚杜嘎爾將該革員貽誤情形嚴行審訊定擬具奏該犯韓會林等三名著張廷岳阿爾塔什達解赴烏里雅蘇台交該署將軍等歸案審訊並將該犯等原供一併鈔送奎昌等覈辦達爾濟所部官兵卽著杜嘎爾另派妥員管帶以資得力阿畢爾米特游牧邊界及巴勒達爾多爾濟游牧邊界均有賊匪竄擾見在

該逆已竄過因爾板賽堪地方齊默特多爾濟伯克瓦齊爾業已
追剿無及逆蹤飄忽靡常難保不復圖回竄著張廷岳阿爾塔什
達督飭各軍妥籌防剿杜嘎爾務當偵賊所向實力掃蕩迅殄逆
氛將此由六百里各諭令知之○諭文麟景廉奏肅州回匪撲進
安西州城立時擊退並賊擾敦煌縣境各摺片肅州回逆屢竄出
關七月初二日撲入安西州城當經該城文武及駐防該處之提
督張玉春等督率弁勇登時擊退該地方文武員弁雖屬疏於防
範尙能將賊眾立時擊退力保危城均著免其議處提督張玉春
副將柳致勝協守出力均著交部議敘其餘出力員弁著准其查
明酌保毋許冒濫該逆雖經東竄難保不去而復來著文麟景廉
督飭該城文武實力防剿以杜窺伺其竄擾敦煌之賊經李天和
等於秦安坊地方擊敗該縣四鄉被賊蹂躪情形可憫著文麟等

妥爲撫恤毋使失所並著飭令在防官軍遇有賊蹤竄近迅速堵
勦力遏狂氛見在賊匪紛擾關外安敦玉等處均形喫緊若不速
籌堵蕩恐哈密後路漸致梗阻成祿一軍本應出關著卽先派數
營前赴嘉峪關扼紮以防賊匪出竄之路一面飭令關外三營隨
時截勦力保完區徐占彪一軍計已由蘭州拔隊西進著左宗棠
催令迅赴肅州將該處賊股力籌勦辦毋任紛竄成祿於徐占彪
抵肅後卽當統率所部出關相機前進毋稍濡滯本日據張廷岳
等奏甘省回匪時由肅州一帶出邊竄擾圖撲庫倫等語成祿於
肅州一帶要隘設法堵截並著左宗棠飭令徐占彪到防後分撥
兵勇妥爲布置以免賊匪出竄邊外益滋蔓延將此由六百里各
諭令知之○命曹克忠接統劉銘傳軍赴肅州防勦○予土魯番
陣亡署同知許清貴祭葬世職○己未諭軍機大臣等文碩奏籌

辦沙山子民團事宜一摺沙山子團紳趙興體派隊在瑪納斯呼圖壁交界地方截擊烏魯木齊援賊尙屬得手該處民戶聚積日多自應妥爲拊循以壯聲勢仍著文頤隨時酌度情形妥爲籌辦千總李昶遇賊受傷曾否就痊文頤已派都司札拉豐阿等帶兵前往布倫托海查看情形筆帖式文齡接辦李昶諸事如果相宜卽著賞給五品頂帶俄人行至察罕鄂博折回聲言秋涼再由西進著文頤飭令趙興體等豫爲籌畫稟商辦理榮全業已啟程前赴伊犁帶兵無多所有後路解餉及轉運事宜著奎昌多布沁札木楚文頤懍遵前旨妥速籌辦毋稍推諉沙山子等處未運糧石卽著文頤飭令委員等提存貞義堡內以備榮全後路接濟前經疊諭杜嘎爾抽調馬隊一千名令吉爾洪額訥蘇肯帶赴榮全軍營著該副都統迅速飭令啟程毋再延緩將此由六百里各諭令

知之○庚申諭軍機大臣等恭親王呈遞巴揚阿稟函內稱湖南益陽龍陽匪徒已散道州土匪尙有一二千人風聞武岡州有六月初旬被圍之說至龍陽之變實由該邑鄉紳陳少海恃與巡撫劉崐之子爲親家倚勢貪功草菅人命誣殺團首劉秀芝遂致激成釁端陳少海全家被害帶兵道員李光燦副將陶藻參將羊瀛均未捕獲一人羊瀛一軍尤甚於賊鄉人切齒見聞著名匪首施玉聚眾四五百人在武岡山內竊藏又洞庭西湖巷內有大頭目劉鴻怡原係湖北候補縣丞棄官爲寇湖南州縣賢否不齊或辦案稍有枉縱該匪等卽藉口滋事請據稟轉奏派員查辦等語湖南散勇會匪徧地皆是該處有司專以敷衍了事養癰貽患深切隱憂著派李瀚章馳驛前赴湖南將該省文武各官粉飾貽誤各情確切查明據實參奏毋得以奏報肅清在前稍有回護其整飭

吏治保衛地方各事宜亦著詳悉熟籌奏明辦理再巴揚阿又稱
夥匪內見有僞天王東王西王南王北王名號並肆用從前洪秀
泉僞記等語並著李瀚章嚴密訪查如果實有其事卽應迅速派
兵掩捕盡法懲治以遏亂萌原稟著鈔給閱看將此由五百里諭
令知之○諭巴揚阿遞寄恭親王稟函詳述湖南會匪情形業據
恭親王呈覽已派李瀚章前往查辦矣地方公事專歸該省督撫
具奏若此事關繫重大非尋常地方公事可比該將軍有奏事之
責本可據摺奏聞無所用其顧忌嗣後遇有此等緊要事件卽著
隨時據實奏聞將此諭令知之○辛酉諭軍機大臣等杜嘎爾奏
追剿潰匪殄除淨盡一摺潰匪竄踞公阿畢爾米特旗遊牧地方
經福珠哩等帶隊馳剿於賽堪阿林之北那林渾第等處將賊匪
四百餘名悉數殄除賊首圭堆老四亦經殺斃其馬受王大漢晃

老五等是否一併擒斬仍著杜嘎爾詳悉具奏昨據張廷岳等奏稱阿畢爾米特游牧邊界及巴勒達爾多爾濟游牧邊界均有賊匪竄擾見在已竄過固爾板賽堪地方是逆蹤飄忽靡常難保不肆行紛竄杜嘎爾見飭各隊在札達噶圖地方駐紮並派員在固爾板賽堪及翁音河等處偵探賊蹤仍著認真探防遇賊卽擊毋稍鬆懈昨有旨將達爾濟革職拏問其所部官兵諭令該副都統派員管帶卽著遴派妥員接統以資得力庫倫防務緊要張廷岳阿爾塔什達仍當就見有兵力嚴密防剿迅掃逆氛將此由六百里各諭令知之○壬戌賜丁錦堂等九十二人武進士及第出身有差○癸亥賞通州王恕園等處賑米六百石○允戶部議由部庫借撥黑龍江俸餉銀五萬兩並諭直隸等省速解黑龍江積欠俸餉暨整裝銀兩○甲子諭軍機大臣等劉長佑奏查明粵西大

概情形見籌整頓等語粵西近年以來吏治軍政廢弛已極以致
伏莽未除強團不法劉長佑見擬將邊關內外各軍由馮子材整
飭調遣此外各營擇得力道府數員分帶任以勦捕之事藉察廉
能並於調撥時量加裁併所籌甚是卽著照所擬辦理惟須慎選
賢能道府督率廉能牧令隨時隨事加意整頓實力奉行不可徒
託空言致負委任藤縣永安股匪前已諭令劉長佑等剋日殄滅
著卽嚴飭盧殿清等認真勦捕務絕根株毋任蔓延爲患南太泗
鎮等府距省較遠更易藏奸尤當次第廓清掃除餘孽以靖地方
至該省兵力半駐越南邊境內地本不免空虛著馮子材迅將鄧
建新等股及早殲除以綏藩服並可騰出兵力會商劉長佑擇要
布置綏靖疆圉將此由四百里各諭令知之○乙丑諭軍機大臣
等本日有旨將劉崐開缺另候簡用令王文韶署理湖南巡撫吳

元炳署理湖南布政使矣劉崐見有應行查辦之案著李瀚章傳知該前撫仍在湖南聽候查辦俟此案奏結後再候諭旨王文韶吳元炳署理撫藩各篆能否勝任並著該督隨時察看據實具奏將此諭令知之○諭奎昌多布沁札木楚奏抽撥官兵赴臺堵剿慶春奏籌辦臺站事宜各一摺奎昌等以畢畱圖廟被圍之賊詐降逃遁恐南路一帶臺站爲賊所擾見派棍噶札勒參帶兵前赴哈爾尼敦翁音河適中等臺擇要駐紮保護糧道卽著督飭該呼圖克圖實力防守毋稍疏虞前據杜嘎爾奏福珠哩等軍在那林渾第地方將潰匪兩股剿除淨盡賊首主堆老四等亦經殲斃當經諭令該副都統認真探防遇賊卽擊見在翁音河等處有無另股賊蹤仍著杜嘎爾嚴飭所部確實偵探相機進剿毋稍疏虞烏城兵力本單棍噶札勒參見紮哈爾尼敦一帶總以力顧後路爲

要毋得貪功輕進致烏城空虛或有疏失庫倫防兵糧石慶春見
飭管臺參領等將喀喇沁臺站壅滯軍糧設法催運並令迎提軍
糧差官洪富等赴臺督運卽著檄飭在事各員迅速辦理源源運
解毋稍稽遲額勒和布到京見在請假一月俟假期屆滿卽飭該
都統馳赴新任所有臺站分段責成事宜仍著慶春趕緊籌畫奏
明舉辦不得以接替有人稍涉推諉並著奎昌多布沁札木楚懷
遵九月十九十月初一日諭旨將邊外臺站如何分段整飭之處
詳慎籌辦迅速奏聞將此由六百里各諭令知之○以何廷謙爲
內閣學士

由詹事選

唐王森爲左副都御史

由宗人府承選

○命劉崐開缺

另候簡用以王文韶署湖南巡撫吳元炳署湖南布政使

由翰林院侍講

署學士

○己巳子山東軍營病故提督王心安祭葬卹廕加等諡果

毅○辛未榮壽公主額駙志端病故賞銀一千兩治喪○壬申諭

軍機大臣等景廉奏遵旨籌畫進兵一摺景廉奉命進規烏魯木齊見已檄調駐紮安西等處步隊三營交提督張玉春統帶由巴里坤向西進發並咨調巴里坤綠營官兵三百名隨同進攻統計兵勇三千有餘防剿兼籌實屬不敷分布景廉已會商文麟飭令孔才馳赴西路調齊鎮西定西等營暨奇古一帶兵勇聽候調遣卽著酌度情形妥爲駕馭以資得力成祿卽懷遵前旨迅統所部剋期出關不准再涉遲延景廉軍餉前已由西征糧臺借撥銀十萬兩並催令四川等省將月協專協等款歸數籌解著戶部再籌撥銀十萬兩解至察哈爾由景廉派員迎提應用慶春當派員護解催趲前進以期迅速此項餉銀到尙需時准景廉先於烏科兩城各借撥銀二萬兩著金順奎昌多布沁札木楚常順文碩照數發交該委員運解回營俟部撥餉銀解到卽行扣還景廉見需健

駝六百隻牛二百頭羊二千隻著文碩飭屬於烏梁海等處代爲購買此項價值卽由借撥餉銀內提出發給至軍行糧道最關緊要景廉見擬派員分赴巴里坤奇臺古城一帶查看採辦軍糧必須寬爲籌備以供支放著伊勒屯文麟隨時照料毋稍膜視景廉迅將諸事布置妥協刻卽督隊西行力圖規復毋誤機宜安敦玉等處險要著文麟撥兵填紮嚴密防守不可稍涉大意關外軍情緊急烏里雅蘇台又時虞賊匪回竄著金順迅卽馳赴新任將防勦事宜悉心布置以副委任另片奏請調員差委及分撥馬隊等語榮全軍營前已將富和等十員發往足敷差委本日有旨將景廉簡放烏魯木齊都統哈密幫辦大臣令錫綸補授並令赴景廉軍營隨同辦事矣穆圖善如能分撥吉林黑龍江馬隊二三百名歸景廉調遣卽著檄令兼程出關以資攻勦其請撥洋槍軍火已

諭令李鴻章等籌解矣將此由六百里各諭令知之○諭據景廉奏遵旨籌畫進兵一摺景廉進規烏魯木齊因哈密僅有馬步隊三營將後路駐防三營調赴哈密由巴里坤向西進發其安西敦煌兩處卽由文麟分兵駐紮以資防守安敦玉等處爲巴哈東路聲援見在屢被肅回竄擾茲又將駐防三營拔赴前敵文麟亦未必有兵可撥後路益形空虛殊屬可慮本日已諭令成祿剋日帶兵出關以資厚集第念肅州一帶必須有兵填紮方足截回氛之西竄壯關外之聲威著左宗棠懍遵疊次諭旨檄催徐占彪一軍迅赴肅州將該處賊股力籌剿辦毋任紛竄烏魯木齊爲逆回老巢醜類甚眾阜康亦爲賊踞勢成犄角景廉所部僅三千人益以成祿一軍兵力仍形單薄必須另添勁旅扼紮關外庶可聯絡聲勢前經諭令曹克忠接統劉銘傳所部淮軍拔赴肅州將來此軍

抵肅若令徐占彪率隊出關分紮安敦玉等處足爲景廉等後勁並著左宗棠斟酌情形豫爲籌畫毋誤事機景廉等軍餉前據袁保恆奏先撥銀六萬兩派提督李炳勳等領解赴哈等語此時行抵何處著左宗棠嚴飭該提督等迅速西行並令沿途員弁妥爲護送俾得早抵哈密以利師行其餘四萬兩並著該督飭令西征糧臺迅速續撥解往毋稍稽遲將此由六百里諭令知之○癸酉諭軍機大臣等劉崐奏官軍攻克螃蟹老巢見飭進剿清江南北兩岸一摺援黔各軍自剿除雷公山苗巢後該逆卽收眾聚糧屯踞螃蟹分占麥哨等處負隅抗拒提督龔繼昌等分路進攻疊平逆寨併力攻克螃蟹老巢惟清江南北兩岸尙有亂苗占踞見已飭龔繼昌等先將丹江西南黃茅嶺開懷兩路底定由凱里前進掃除麻凱逆氛進圍北岸之黃飄等處再由清平蕩滌北岸劉崐

前已有旨諭令另候簡用卽著王文韶督飭各軍節節進剿實力
掃蕩並著曾璧光周達武嚴飭黔軍隨時與楚師聯絡會合兜剿
以期迅掃逆氛肅清黔境將此由五百里諭知曾璧光並傳諭周
達武王文韶知之○子貴州陣亡遊擊向信玉等祭葬世職○丙
子諭金順簡汰兵勇迅赴烏里雅蘇台將軍任○丁丑諭何璟等
撥山西應解京餉銀十萬兩充景廉軍餉○添設吉林三姓佐領
一驍騎校二領催前鋒各五名披甲一百二十五名裁西丹三百
名○戊寅諭軍機大臣等奎昌等奏官軍剿匪獲勝生擒逆眾各
摺片據稱達爾濟帶隊於九月初九日在喀雅喀喇烏蘇地方剿
匪獲勝逸賊約僅百名此股殘匪見竄何處翕音河一帶是否尙
有另股竄踞前據杜嘎爾奏主堆老四業經殺斃茲據賊供該逆
向南山逃竄著奎昌多布沁札木楚探明賊蹤嚴密設防以遏奔

突杜嘎爾當懷遵疊次諭旨督率所部覘賊所向相機進剿迅掃逆氛此項賊匪皆由肅州竄出據獲賊供稱大頭目馬四久伏肅州若不擄其巢穴則該逆首時噉匪黨出關爲害伊於胡底著左宗棠檄催徐占彪趕赴肅州認真按捕務將馬四老巢迅速攻毀毋任逆首稽誅致令蔓延爲患成祿如尙未西進亦著督率將士協同按捕以絕根株達爾濟前因輕率招降縱賊遠颺業經降旨革職拏問著奎昌多布沁札木楚杜嘎爾仍遵前旨將該革員貽誤情形嚴行審訊定擬具奏達爾濟所部官兵杜嘎爾擬派何員管帶並著該副都統一併具奏榮全前赴伊犁帶兵僅一百餘名甚形單弱著杜嘎爾迅飭吉爾洪額訥蘇肯統帶吉林黑龍江官兵各五百名剋日前往聽候榮全調遣該二員啟程日期卽著迅速具奏毋再推諉遷延儻榮全因兵力不敷貽誤事機恐杜嘎爾

不能當此重咎也將此由六百里各諭令知之○諭劉長佑馮子材奏會籌越南軍務劉長佑奏接奉諭旨縷陳下情並擒獲藤縣賊首各摺片越南匪首蘇幗漢等雖聲稱投誠仍復心懷反側自應乘其窮蹙悉力殲除以絕後患著劉長佑馮子材督飭派出各軍迅將海陽太原一帶匪眾悉數掃蕩匪首蘇幗漢等務須設法擒獲毋任漏網其河陽興化等處距邊較遠自不宜窮兵深入轉致邊圉空虛該撫等當傳知該國王自行攻剿以清餘孽儻該匪竄近邊境仍當隨時派軍協剿毋稍膜視藤縣所屬之峯門等處久爲賊藪經官軍進剿將滿村金屯匪巢先後攻克並擒獲匪首何先體等正法辦理尙妥所有在事出力員弁團紳著劉長佑擇尤附案請獎以示鼓勵仍著督飭副將陳培桂等將永藤交界逸匪接捕淨盡一面妥籌善後綏靖地方革生梁汝弼聚眾逞兇罔

知法紀亦當嚴行懲辦以儆效尤永甯州四十八嶠之逃匪伍琬等竄往柳城余家上雷等村結黨滋擾著飭令遊擊黃興仁等迅速勦辦務絕根株劉長佑所陳爲官吏除積習爲地方圖久安務當振刷精神實力籌辦用副委任至所稱從前楚軍營員流寓楚省者尙不乏人恐有招搖等事該撫但當隨時查察有犯必懲毋庸鯁鯁過慮也前因馮子材等奏進勦越南賊匪奪獲象隻擬挑選進呈當照所請准其挑選數隻解京第念越南貢象甫經到此若再將象隻進呈道遠跋涉恐沿途州縣供應不無擾累所有此項象隻著馮子材發給吏官領還毋庸解京將此由四百里各諭令知之○庚辰丁寶楨因病賞假以文彬署山東巡撫由布政使署○辛巳張之萬開缺養親仍以文煜兼署閩浙總督由福州將軍署○追予湖北陣亡知縣姚國振於麻城建祠○癸未諭內閣伊犁自同治

五年失守逆回盤踞淪陷數年該處官弁軍民人等身陷賊中本
有應得之罪惟念當時回氛猖獗該官弁軍民人等被其僞脅未
能自拔尙屬情有可原朝廷惠愛黎元務從寬大所有從前在伊
城被陷之官弁軍民人等均著加恩免其治罪並著署伊犁將軍
榮全徧行宣示寬其既往之愆予以自新之路該官弁軍民人等
務各激發天良共保地方毋任回匪再行窺伺至該處人眾顛沛
流離情形困苦殊堪廕念並著該署將軍妥爲撫恤毋令失所用
副朝廷惻癡小民至意○諭軍機大臣等榮全奏探道西進布置
後路機宜並請飭催杜嘎爾迅撥馬隊杜嘎爾奏籌辦調往伊犁
各隊並派員接統達爾濟所部官軍暨擒獲賊供情形各摺片榮
全見已行抵科布多所屬札哈沁之沙札蓋臺所有籌辦駝馬及
畱備後路接濟均尙周妥惟從此西進天氣嚴寒程途荒僻殊深

盧念榮全勇於任事不避艱險甚屬可嘉著卽激勵官兵探道前進早抵伊犁妥爲經理其後路轉運各事宜仍著奎昌多布沁札木楚常順文顧安速籌辦不得稍有貽誤索倫官兵遠在葦塘子流離日久緩急難恃自非得力勁旅不足以壯聲威杜嘎爾見已令吉爾洪額訥蘇肯整隊啟程並因應放餉銀咨商慶春先由部撥榮全軍餉內截留銀五萬交口北道辦理月餉下餘解營趕辦各項自因移緩就急起見著慶春卽行撥給應用並著奎昌多布沁札木楚於烏城餉銀內提撥五萬兩解交榮全以抵截留之款杜嘎爾務當飭令吉爾洪額等迅速拔隊前進毋稍遲緩經過烏科臺站應備各項並著奎昌等豫爲籌備毋致沿途阻滯是爲至要杜嘎爾請撥鍋帳五百分本日已諭令工部照數撥給該副都統趕緊派員領取以資應用並將該副都統所部各營見有鍋帳

先行湊齊飭吉爾洪額訥蘇肯迅速西進不得藉詞耽延達爾濟所帶之隊杜嘎爾擬派參領貢果爾接統並先令營總幹克巴雅爾台暫行管帶著卽飭令貢果爾星速前往統帶察哈爾官兵在翁音河一帶扼紮防守期與烏庫兩城聲勢聯絡刻下敗殘餘匪竄往何處據獲賊任發汶供稱賊首馬受等是否被殺並未確知等語仍著杜嘎爾查明具奏一面確探賊蹤認真追剿迅掃逆氛所有任發汶供詞並著咨送奎昌等覈辦記名副都統成山侍衛永德業已到營杜嘎爾當督同該員等將所帶隊伍相機布置協力防剿毋誤事機榮全另摺奏保經理臺站採辦駝隻尤爲出力各員已照請獎勵其餘正臺幫臺出力人員並著奎昌多布沁札木楚常順文碩侯西進大兵過境後查明分別請獎榮全又奏接據伊犁被難官員來稟情形本日已明降諭旨將該官弁等免其

治罪並令榮全妥爲撫恤矣該處官民感戴國恩其志可嘉所有各營官員著仍以原職分管各眾並准以喀爾莽阿暫署錫伯營領隊圖記各營事務卽責令一體照料仍著榮全到伊後察看情形多方激勸以固人心而維大局將此由六百里各諭令知之○是月蜀綏山西薩拉齊等五廳縣被水新舊額賦並賑徐溝平遙二縣貧民一月口糧

十一月丁亥朔飭山西陝西迅解金順營餉○己丑諭各省督撫密保堪勝藩臬道府人員○諭理藩院嚴飭錫林郭勒等盟長支應臺站駝馬○以李鶴年爲閩浙總督錢鼎銘爲河南巡撫孫觀爲直隸布政使李文敏爲廣東按察使

由直隸大應廣道遷

○癸巳左宗棠

奏八月二十一日令提督傅先宗楊世俊將造成船隻於狄道先架浮橋緣狄道對岸地勢寬坦又北距賊巢尙隔山溝數重非若

三甲集岸峻湍急又正對賊巢爲賊所必爭也二十二日傅先宗楊世俊各督所部臨河放船牽纜橫渡船甫抵岸卽派營過河築壘二十三十四日橋工成二十六日傅先宗飭提督彭國忠四營渡洮營於西坪二十七日楊世俊飭提督張仲春以宗岳四營渡洮營於三義河飭遊擊何建威以四營渡洮營於陳家坪山頂每官軍渡洮結壘賊時以零騎數十或百餘往來窺伺然一擊便走不肯戀戰也唯陳家坪山巔立營時賊以其與三甲集巢穴漸近二十八九日亦於黑山頭築四壘七卡守之又於大坪山紅莊連築數壘與黑山頭賊壘互相聯絡其高家集胭脂山亦皆添築賊壘以防狄道官軍九月二十二日賊糾高家集各股分撲官軍營盤均經擊退敗賊二百餘名是夜四更有賊千餘潛襲彭國忠營彭國忠詗知之先伏精銳於營盤左右山溝賊至伏發斃賊多名十

八日傳先宗楊世俊會攻高家集傳先宗率所部由西平以進楊世俊率所部由西平山梁進何建威率所部由楊家嶺進立將當路十數卡一律踏平賊皆望風遺逸師抵楊家嶺西邊黑山頭賊壘出賊來援總兵敖天印擊走之乘勝破紅莊賊營一座十九日仍分三路疾進步卒整隊排行馬隊分左右鈔擊立將高家集八營一律踏毀敗賊縮退高家集大堡傳先宗楊世俊令步軍合圍堡賊以馬隊遮隔援賊甫將大堡外木柵拔毀參將廖嵩鼓勇先登中賊殞命將士憤甚四面猱附而上立克高家集大堡分兵平毀新集子壩平川吉家山各莊堡計兩日內殺賊二千餘名生擒馬王等二十一名軍前正法其紅山各賊壘亦次第攻破二十六日楊世俊攻馬家集克之斃執紅旗紅衣賊目一名餘賊鮮得脫者遂向草灘前進行至中途瞥見賊騎一起從西馳至卽設伏截

之擒騎賊十餘名而奪其馬餘賊驚覺突圍竄去訊之生擒逆賊
供稱竄去者爲甯河賊目馬五馬沅亮及悍黨數十名楊世俊率
所部策馬疾追立將馬五馬沅亮及餘逆悉數生擒而還馬五因
傷重不肯行已於軍前正法檻送馬沅亮來安定臣宗棠親提訊
鞫馬沅亮供係本名馬格力布卽上年狄道陣擒巨目綽號張飛
之弟在甯河充阿渾管回眾二千餘此次因探封壘消息被擒比
經斬決梟示方傳先宗楊世俊兩軍之架橋渡洮也臣等會商狄
河逆回悍黨盡踞三甲集太子寺大東鄉固宜設法渡洮痛勦然
不先由狄道出師牽制賊勢令賊備多力分旣非先其易者後其
節目之義且其時雨雪連旬洮河旋消旋漲康家巖近岸之處洲
渚縱橫猶可鳧水而過然正溜埽西岸邊家灣鄧家灣而下水面
雖僅數丈深可滅頂人馬不能踰越且康家巖對岸山腳直插洮

濱卽得達彼岸亦無列隊之處賊又於岸邊掘壕數道伏匿其中
開槍抗拒勇士爭渡不得往往被傷實爲非策擬俟洮流漸落再
議架橋而諸軍急於赴戰必欲力爲其難八月二十八日提督徐
文秀劉明燈親赴狄道接取新造船纜順流而下駛過鄧家灣賊
壘副將喻友才參將殷德益爲槍子所中登時殞命幸各營隔岸
競開劈山礮將船纜搶護提歸東岸得免損失斃賊亦多九月初
一日梟水衝渡攻集隔岸礮臺弁勇淹死者三十餘名受槍礮傷
者十餘名適臣宗棠派營務處前福建布政使王德榜道員朱明
亮帶親兵兩哨察看形勢到康家巖列隊助剿開洋槍測准轟擊
斃賊約二百名賊復由皮船分渡巖上下游及沙泥站等處圖劫
運道初七日徐文秀率隊擊之值賊由洪濟橋渡過沙泥徐文秀
調各營劈山礮轟之擊沈賊船一隻斃賊多名十一日徐文秀劉

明燈見水勢稍退議輓纜牽船搶過河灘築壘賊出大股排列河干徐文秀等見賊勢團聚連施開花大礮斃賊極多並開放螺絲後膛大礮轟坍對岸礮臺一座賊紛紛駭竄軍士撥船牽纜乘勢急進卒以水深湏急不能徑渡廢然而返十七日賊由上游柳林溝口偷渡經總兵黃宏藻擊退擒斬多名副將眭金城被賊飛子洞穿左脅登時殞命二十三日總兵楊芳桂赴蘭州運糧回營所部參將楊其昌率步隊百餘由沙隴迎護中途遇伏力戰陣亡弁丁從死者七十餘名徐文秀劉明燈所部遊擊邊得貴參將楊正茂擊賊新田鋪劉明燈率馬隊襲賊鄧家灣東均獲小勝徐文秀因水勢漸落船橋終不能成憤甚稟請由狄道過浮橋從黑山頭橫擣三甲集臣宗棠深韙其議然康家巖對岸及沙泥站以下一帶洮西渡船約二十餘隻皮船更多不勝數皆賊有也官軍繞狄

道浮橋以登彼岸雖勝算可操然黑山一帶賊壘林立官軍踰溝數重仰攻已難設師期稍滯而賊乘船競薄東岸畱防兵力已單尤非妥策因飭暫輟此行飭王德榜朱明亮率臣營親兵千餘名益以提督陳廣發副將凌春臺步隊兩營提督陶生林馬隊一營於距康巖六十里站灘間道過狄道浮橋以趨八羊溝並飭調楊世俊宗岳數營以厚兵力飭傅先宗率所部力攻黑山頭以掣賊勢飭劉明燈豫備柳林溝架橋飭徐文秀豫備康家巖架橋如見王德榜師出八羊溝則列隊東巖以待二十九日王德榜率數十騎由站灘先行過楓樹灣突有回逆自叢薄間衝出刺傷數人下馬王德榜測準發槍連殪二賊正相持聞大隊馳至賊始駭逸旋派隊接山擒斬三十餘賊十月初一日王德榜朱明亮由狄道過浮橋楊世俊調宗岳軍親率馬隊同進連日審看地勢見黑山頭

賊壘憑高俯瞰官軍仰攻非便惟石鼓墩與黑山頭共一山梁官軍立壘於此據賊之中則左埽黑山右埽邊灣均爲得勢初五日五鼓潛師夜起王德榜楊世俊派宗岳營總兵高登玉親兵營總兵鄧榮佳副將余起立各率所部上石鼓墩搶紮兩壘適值風霧四塞賊不辨官軍多少未敢徑前撲犯比壘成霧散賊以大股來撲官軍憑牆礮擊斃賊無算黎明賊以一股圍撲石鼓墩營一股踞山腰徐文秀等於隔岸遙見官軍已到石鼓墩乃卽列隊架橋搶渡山腰之賊飛赴邊家灣堡助守王德榜揮隊截之其圍攻石鼓墩營之賊見勢不支亦撤圍來援官軍分途縱擊勇氣百倍朱明亮怒馬衝鋒手刃三賊陶生林繼之高登玉鄧榮佳余起立從石鼓墩山壓下合攻邊家灣賊壘破之徐文秀劉明燈揮所部搶過西岸立成三壘隨隊助剿斃賊無數初七日傅先宗率所部由

石鼓墩進攻黑山頭各壘王德榜分宗岳兩營及親兵兩哨助之而自率親兵八哨及陳廣發凌春臺陶生林等營會同徐文秀攻鄧家灣三甲集賊眾見鄧家灣被圍急喊悍黨萬餘由山梁紛馳來援王德榜朱明亮徐文秀劉明燈一面分禦援賊一面緊攻壘賊槍礮刀矛層遞轟刺鏖戰兩時許賊屍山積立將鄧家灣賊壘攻破援賊敗潰不可止馬隊沿岸掃蕩步隊上山躡追愈戰愈奮遂將三甲集鄧家灣附近各村堡一律破除擒匪供稱逆目謝頭號王海發均斃於陣傳先宗攻黑山頭之軍探悉該逆緣岡結壘繇亘二十餘座其西南又與新路坡紅馬家賊巢相連既須仰攻尤防牽制因飭王德勝設伏蓮花山遏新路坡等處援賊飭何建威率所部攻黑山中梁爲中路彭國忠率所部繞八羊溝出黑山之南攻其前敖天印張德勝率所部攜鋤鋤循樵徑出黑山之北

襲其後自率所部爲中前路援應其石鼓墩赴黑山頭之路爲匪掘斷峻削難登又守以堅壘惟飭石鼓墩兩營作進攻之勢以綴其力部署後銜枚各發四更時中前兩路皆抵賊壘槍礮雷轟賊死拒歷兩時許何建威拔幟先登破其第一卡守賊墜壕鼠竄彭國忠朱運廣亦督隊猛進繼破左右兩卡各壘之賊以黑夜未出天明均悉銳來援傅先宗揮隊衝突正酣戰間敖天印已攀藤緣磴從山後壓下賊咸驚愕傅先宗突入賊陣手刃悍逆二名賊慌亂不及入卡四散奔潰各營風馳電掃立將黑山頭袤延數十里大小賊壘悉數剷平陣斬匪黨五百餘名其新路坡之賊聞黑山頭礮聲於卯刻由蓮花山後擁至王得勝伺其偪近由山腰截出賊遇伏氣奪王得勝率隊繞前擊之賊敗奔返巢擒斬亦眾初八日傅先宗畱彭國忠所部兩營並建字兩營分紮黑山要隘自率

所部緣黑山後嶺搶上三甲集南山巔立營，嗣得黑山敗賊屯紮八甲口之內，調馬隊向王家坪一帶沿河搜剿，各村出馬步四千餘結陣負嵎提督丁桂智總兵王銘忠分兩路包抄，賊分隊以應。敖天印率隊由山巔壓下，賊腹背受敵，奪路分逃。馬步各隊立將三甲集以西村寨土堡掃蕩無遺。王德榜初七日破賊後，紮黑山迤南三甲集之前，傳先宗因紮三甲集後，以相犄角。徐文秀、劉明燈亦於初八日將康家巖浮橋搭成，劉明燈駐守，徐文秀接紮趙家地，聲勢均已聯絡。惟楊世俊一軍因胭脂三川油油溝等處尚有賊壘，於初七日五鼓率所部分三路進剿，賊憑壘死守，各弁勇填溝銳進，立破賊壘三座，殺賊三百餘名，生擒九名，棄壘逃者爲馬隊所蹙。越山狂竄，撤隊後接王德榜函，會以鄧家灣黑山頭皆經得手，惟三甲集巨巢未下，遂於初八日率馬隊翻山南下，與各

軍合沿途截殺敗賊多名初九日會攻三甲集王德榜朱明亮率所部出其前宗岳軍繼之楊世俊率馬隊沿河順川而進楊芳桂及楊正茂繼之徐文秀率所部及尤成章橫埽而前沈玉遂督果軍繼之傅先宗所部據山俯擊兼瞭邊援賊劉明燈所部於水家溝沿河截剿黎明各路以次進逼逆首馬占釐初猶登牆喊黨防守檜礮如雨繼以木石各軍冒險猱升前者墜後者繼自卯迄未周麾而登馬占釐雜敗賊中奪門向八甲口而逃各軍分攻康家口陽埕各大小堡卡十餘所破之共斃賊二千餘名生擒百七十四名官軍亦有傷亡初十日徐文秀移紮三甲集餘軍分扼要隘十二日各軍攻破張家坪堡及大貝坪甘坪紅莊張家灣各堡十三日劉明燈朱明亮攻破鮑家莊大坪等堡十四十五等日諸軍進大東鄉口攻剿各賊巢擒斬均多惟僅據各路馳報其戰事詳

細情形應俟續奏竊維狄道河州夙爲回眾萃聚之所土著漢民不過十之二三回民恃其族大丁多習爲盜賊漢民之弱者供其役使謂之從教之戶其稍強不甘從教而勢力不敵往往失業爲匪游掠地方所謂黑頭勇者是也又一種撒拉回民居河洮西甯之間別爲風氣亦以剽掠爲業百餘年來不受官司約束與河湟諸回互相勾結承平無事時燕齊皖豫響馬劇盜多出其中此固不獨甘肅應除之賊臣宗棠初到安定河州諸賊目紛紛上稟求降而於繳馬械求安插諸務獨不一及比知其未受痛創賊心未死遂飭諸軍渡洮進剿茲幸連奪要隘扼賊之吭斬馘共萬餘計足寒賊膽而快人心察看賊勢由三甲集以西至太子寺雖賊壘林立而其眷屬死黨均盡聚大東鄉一隅大東鄉在三甲集太子寺北周百餘里山巒層疊路徑狹險賊以重利啖撒拉逆回誘其

助拒官軍非剋期數路冒險排進節節埽除不能確操勝算見已
密飭傅先宗楊世俊先攻七甲集各壘卡直擣太子寺畱兵守之
乃回攻大東鄉與諸軍分道並進應可掣賊勢而速戎機又奏提
督楊世俊張仲春在秦州等處剿賊獲勝情形馳報在案此股竄
逆經官軍擊敗後復分擾成禮西和一帶雖經提督殷華廷田連
考暨副將王聲揚等分投截擊疊有斬擒而山谷叢錯道路分歧
敗賊竄伏其間時出肆掠當經臣飭殷華廷暨管帶安左營副將
張養吾分撥所部扼紮徽縣西南三十里之富家鎮以防西成竄
賊而顧徽兩運道九月二十一日殷華廷調賊由成縣之西陳家
莊向祈家壩竄走恐其由黃渚關出娘娘壩擾我糧運一面函約
駐秦之田連考率隊會剿一面帶所部馳赴黃渚關一帶攔頭截
剿沿途探知陳家莊竄賊已經湯聘珍派張養吾在祈家壩二即

廟等處擊敗困賊於白馬寺遂星夜趨行復因山路崎嶇至成縣改騎爲步二十五日抵白馬寺會商張養吾於二十七日五鼓出隊分兩路進剿黎明賊見官軍猝至不敢接戰翻山向閭家河竄出適另有股賊從西河竄來與之合賊勢漸張二十八日田連考率所部抵閭家河商同殷華廷張養吾分路進剿二十九日辰刻出隊賊方造飯未熟忽覩官軍掩至悉力抗拒相持時許田連考率所部左右盪決陣斬悍賊多名紅衣賊目一名賊眾大潰正追逐閒右莊伏賊突出張養吾率隊擊之賊敗奔上山各軍分隊齊登巖上拋石如雨官軍奮勇衝殺賊眾辟易窮追三十餘里越嶺五重計殺斃轟斃跌斃之賊四五百名解散被脅難民數百人生擒回逆數十名訊明正法漏逸之賊不過百餘而已又奏據固原提督雷正綰牘稱據管帶旌善營都司穆進善稟報八月初四日

突有賊竄入北山穆進善會同民團乘夜擊之斬馘多名賊敗走
三營雷正綰查係馬彥瀧逆股當派左營提督陳義馳赴東山繞
前截擊親率馬隊向北路追勦副將郎永清總兵李廣珠各率馬
步繼之初十日追至毛渠井揮軍急擊陣斃悍賊二十餘名正收
隊閒忽有另股步賊從山溝衝出郎永清挺身抵拒鏖戰半時李
廣珠陳義趕到併力夾攻賊受重傷而逃十三日據參將李積慶
稟同心城附近之李家岡有馬賊百餘名竄過丁家二溝強營總
兵易元壽率隊迎勦調賊至亢家灣是夜三更乘賊睡熟直前撲
入殺十數人賊驚起格拒混戰逾時賊敗潰竄投山澗計殺賊五
十餘名落巖死者不計其數官軍陣亡一名受傷十名而已據擒
賊馬五娃供首逆金明忠楊百成由河州分出欲在米包山盤踞
再竄東山等情訊畢斬之賊敗後潛與馬彥瀧狗齒身二逆合股

賊黨復添十三日由馬房川竄環縣之二十里溝環捷營副將王楚仁聞報恐賊內竄不及調隊卽率親兵百餘人往敗賊於途乘勝追殺六十餘里至紅德城時已初更王楚仁聞賊大隊尙在火燄山徑往襲之賊倉卒失措紛紛鼠竄官軍尋蹤躡追殺傷過當賊拚死回拒王楚仁身先陷敵連斃十數賊忽頭中槍子登時陣殞弁勇憤主將之死攘臂奮呼爭先殺賊雖互有傷亡而士氣彌厲時前路提督甘大有派左前兩營由野狐關來援賊聞追軍大至分途四竄其竄入合水者數十人經總兵張福齊派隊會合防勇兜擊於北谷廟岔頗有擒斬大股向靈州定邊狂奔因官軍截剿復由靖遠打喇堡乾鹽池適中之地潛遁雷正綰派精選各營追之二十五六等日疊有擒斬賊匿入荒山按覓無蹤臣度賊不能東趨鹽固必西竄會甯急派王德榜王衍慶督率親兵兩哨馬

勇一旗入山搜捕九月初十日誦賊由車道嶺向好麥川竄走躡追及之槍礮齊轟斃賊無數賊回馬抗拒我軍再接再厲賊勢不支馬隊乘勝逐之賊紛紛墜巖而死追殺數十里不見賊蹤而還是役計斃賊百餘我軍僅陣亡勇丁一名旋據後路提督徐文秀報稱水泉洪濟橋夜間有賊偷渡當派馬步追捕至新店子遇賊百餘總兵沈玉遂鄭守南分頭迎擊槍斃紅衣騎目一名殲斃步賊數十名餘賊翻山竄去據擒賊朱二娃子供逆目馬姓由固原一帶回竄河州巢穴常卽馬彥瀧也臣查馬彥瀧等逆不過二百餘騎加以金明忠楊百成一股孱入亦不過數百騎而往來飄忽一擊卽走隴北荒山廢堡極多最易藏奸然無食可掠其必竄併河州無疑見據雷正綰魏光燾及靜甯會甯護運各防營報旬日以來後路並無賊警而河州大東鄉一帶添有賊蹤臣已飭渡洮

諸軍嚴密圍剿聚而殲旃又奏陝甘軍務自金積蕩平化平川安
插周妥後威信既明回族均有求撫不得之意蓋貪生畏死與去
危就安之情卽異類亦有同然也茲據駐化平川辦理撫務之記
名道馮邦棟呈送化平川魚鱗戶口冊籍來營稟稱撫回閭閻與春
陳林等二十餘名據稱見得竄匿西甯之陝回崔三禹得彥白彥
虎馬五馬九兒鄒保和馬生彥馮君葵哈連金等數十人來信羨
其得所哀懇具保投誠並央其呈遞稟詞臣閱該逆等求撫之稟
詞意尙爲真切並稱如有不誠心就撫者卽自行剿洗等語查崔
禹等逆見據西甯大小南川一帶距河州賊巢止一河之隔當飭
馮邦棟傳知閭閻與春陳林等前赴西甯密諭崔禹等如能先將眷
屬送蘭州安置一面相機扼截渡口以遏河賊出竄之路方准收
撫如更能設法直擣河巢則不但免罪且准敘功已於十八日遣

令西行矣頃又據提督楊世俊稟近因軍威不振回眾祈請收撫
未便概與拒絕一起爲陝回首逆楊文治之弟楊文彥八十餘戶
一起爲葑臺堡回目馬應林男婦三千餘口又從教漢民男婦二
千餘口已飭盡繳馬械聽候安插此外乞撫者尙多臣惟驗其誠
僞分別辦理 上諭軍機大臣等左宗棠穆圖善奏官軍攻破賊

壘疊獲勝仗一摺覽奏欣慰此次左宗棠等督軍渡洮連戰大捷
踴毀高家集等處賊堡斬馘萬餘並將三甲集巨巢攻拔軍威不
振賊膽已寒辦理極爲得手惟由三甲集以西至太子寺賊壘林
立其眷屬死黨均聚集大東鄉負隅抗拒亟宜乘此聲威節節掃
蕩左宗棠已飭令傅先宗等先攻七甲集各壘卡直擣太子寺再
回攻大東鄉與諸軍分道並進調度甚合機宜著卽激勵各軍剋
期前進盡殄逆氛以竟全功另片奏中南兩路官軍剿賊情形亦

均得手見在中路平慶鹽固一帶已就肅清馬彥濫等逆竄併河
州大東鄉一帶正可乘勢兜圍聚殲醜類毋令四出蔓延南路各
軍已將河州竄出回股追剿殆盡尙屬出力准由左宗棠彙案擇
尤保獎另片奏回目具稟投誠等語崔三禹得彥等悔罪投誠原
可網開一面惟必須責令直擣河州與賊接仗立功方准收撫此
中揅縱機宜該大臣等務當妥爲籌畫毋稍疏虞其投誠之陝回
楊文彥及葑臺堡回目馬應林等應如何妥爲安插之處並著察
看誠僞相機辦理將此由六百里各諭令知之○予甘肅陣亡副
將喻有才等祭葬世職○戊戌諭軍機大臣等張曜奏查明沿邊
一帶口隘繪圖呈覽一摺據稱肅州之金塔一帶邊牆間有坍塌
平番之裴家營古浪之大靖土門及甘涼南山各口均可通達邊
外陝回崔三等股句串西甯肅州土回分股竄擾人數頗眾是甘

省西北一帶賊蹤出沒靡定實爲沿邊之害見在大軍由三甲集等處進剿恐河州之賊勢窮紛竄西北一帶愈形喫重左宗棠務當通籌大局豫爲防範前據該督奏稱陝回崔三等具稟投誠是否真心悔罪仍著察看情形妥爲籌辦不可稍涉大意肅州回眾時竄玉門安西等處著檄令徐占彪抵肅後將該處防剿事宜速籌布置以通出關之路阿拉善旗紅柳園等處見在有無竄匪著張曜飭令李葆琛等認真截剿以清餘孽北路沿邊口隘並著隨時偵探嚴防毋稍疏懈圖畱覽將此由五百里諭知左宗棠並傳諭張曜知之○己亥予甘肅陣亡副將施鵬殉難提督周顯承等祭葬世職○庚子申諭慶春等整頓察哈爾所屬各臺轉運事宜○辛丑諭軍機大臣等左宗棠穆圖善奏附省各營剿賊獲勝情形穆圖善奏派兵扼紮柳林溝各摺片甘肅附省一帶時有賊匪

竄擾經各路防軍隨時雕剿疊有斬擒不至蔓延爲患見屆嚴寒
河水凍結深恐賊匪伺隙紛乘仍著左宗棠穆圖善檄飭防軍勤
加偵探遇賊卽擊毋得稍涉疏懈渡洮各營已攻克三甲集進規
大東鄉該處賊悍巢堅山徑錯雜我軍深入尤宜穩慎進取方免
疏失穆圖善准左宗棠知照東路空虛前敵無兵可撥因派總兵
李佑清統帶三營扼紮柳林溝遏賊旁竄惟省城密邇巨寇兵力
僅有六營實屬不敷分布曹克忠接統淮軍前赴肅州一帶須由
蘭州省城經過如屆時河州尙未攻克卽著該提督會商穆圖善
或將所部分紮省城附近各隘騰出穆圖善之兵前往省外各要
隘分布似於防剿兩有裨益該提督當迅速拔隊啟程相機籌辦
毋誤機宜省防緊要仍著穆圖善就見有兵力妥爲布置務臻周
密將此由六百里諭知左宗棠穆圖善並傳諭曹克忠知之○以

臺站廢弛撤科布多參贊大臣文碩任仍下部嚴議○景廉奏籌
備軍糧安設臺站各事宜均如所議行○丁未諭軍機大臣等張
曜奏剿辦竄匪情形一摺提督李葆琛等於九月初六等日在紅
沙梁井泉墩地方疊次擊賊獲勝西甯等處回匪六七百人從烏
喇特旗擄掠而歸復經李葆琛等率隊剿擊逸賊遁向鎮番西南
另股竄匪擾及中衛及甯夏縣屬境經張曜督隊迎剿均有斬擒
剿辦尙爲奮勉陝回麇集西甯大通一帶四出剽掠柳林湖素爲
產糧之區連年被擾見經張曜抽調兩營添紮以厚兵力卽著飭
令該官兵等嚴密防堵遇有賊匪竄近卽行實力殲除不可稍有
疏虞其甯夏一帶地方著該提督將防剿事宜隨時相機妥辦以
副委任○以四川災歉停免月協黔餉○戊申陝西巡撫蔣志章
卒予祭葬○以翁同爵爲陝西巡撫譚鍾麟爲陝西布政使

前河南按

案○已酉諭軍機大臣等劉長佑馮子材奏官軍攻克舊街逆巢

首逆就擒一摺逆首蘇帼漢股匪麇聚廣安經瑞麟劉長佑等各派官軍協同圍剿先將舊街賊巢攻克乘勝追殺直抵海甯蘇逆攜其養子亞鄧暨悍匪數人奔竄東興爲官軍弋獲東路漸清此次出力各員准由馮子材查明存記彙案請獎蘇逆既經弋獲是否解至廣東正法仍著劉長佑等詳細具奏該逆養子亞鄧見在潛逃漏網張侍灝亦敗竄十萬山中餘黨紛紛逃回東界亟須速行搜捕悉數擒獲淨絕根株著瑞麟劉長佑馮子材分飭派出各軍實力搜拏以消邊患西路瓊北二山股匪並著劉長佑等飭令劉玉成等軍認真會剿迅殄逆氛將此由四百里各諭令知之○諭入旗嗣後外省官員有應襲雲騎尉恩騎尉世職者卽奏請承襲毋庸調取引見○○文煜等購米四萬石運天津備賑○壬子

予吉林陣亡記名副都統常在祭葬世職○癸丑諭軍機大臣等奎昌等奏請撥銀兩備用一摺舊駐塔爾巴哈台之厄魯特察哈爾哈薩克人丁自失遊牧以來僑居科布多接境額爾濟斯河南之布倫托海一帶奎昌等以該遊牧舊地土脈肥饒水草茂盛較勝布倫托海不若令其仍遷原處卽著金順奎昌多布沁札木楚與常順保英富和文碩會同咨商責成巴彥特古斯妥爲辦理該營舊設總管副總管等缺並責令巴彥特古斯就見在人員內詳加察看如有辦公勤慎才具優長者卽著該將軍大臣等奏請作爲實缺如其不堪勝任亦卽揀選更換以資得力至舊設兵額應如何酌增領催及捕盜兵丁之處著該將軍大臣等妥籌具奏奎昌等所奏官兵廉俸餉銀請自來春爲始按季文發其厄魯特等人丁仍還故土應須餉銀請賞銀一萬兩均著照所請行惟以上

各款均應豫爲籌備以供支放著戶部撥銀二萬兩卽咨照指撥
省分並察哈爾都統務於來年春季埽數解至烏里雅蘇台分別
動用科布多塔爾巴哈台事機緊要亟須大員前往經理常順保
英富和務當星速遄行迅赴新任以重責守將此由六百里各諭
令知之○乙卯諭軍機大臣等文麟景廉奏玉門敦煌賊擾情形
各等語肅州回逆自本年三月至六月間疊次竄擾玉門縣屬之
昌馬湖赤金等處勢甚蔓延其撲犯敦煌之賊於七月閒退竄後
復於八月閒糾集大股紛擾該縣境內情形甚爲喫緊該處僅有
李天和所帶健銳二營兵力較單文麟見派營官王者彥等率領
馬隊百餘名前往援應著卽飭令會合燉煌官兵實力堵剿迅埽
狂氛玉門爲關外首站逆匪出竄首當其衝該處僅有健銳一營
威儀一營亦恐不敷分布文麟等務當飭令該縣文武聯絡兵團

妥籌防範其屢次擊賊出力之員弁團總人等准其查明彙案保奏該逆既有攻撲哈密之謠文麟等尤應加意防範以杜窺伺刻下關外賊氛甚熾若不遏其後路必致紛紛出竄愈無底止著成祿懍遵前旨迅派數營先行馳赴嘉峪關扼紮以資截剿仍俟徐占彪到肅卽行拔隊出關毋稍遷延並著左宗棠催令徐占彪趕緊進發卽將該員到肅日期迅速奏聞將此由六百里各諭令知之○是月蠲緩直隸開州等八十四州縣被水新舊額賦山東濟甯等七十州縣德州等四衛暨東平所被水被旱被蟲舊欠額賦雜課浙江海甯等六十五州縣杭嚴等三衛被水被旱被風被雹並未墾田畝本年額賦雜課緩徵安徽泗州等四十一州縣被旱被水被風被蟲新舊額賦雜課直隸定州等三州縣被水新舊糧租並減免差徭展緩吉林琿春等處歉收應徵倉穀

十二月丁巳諭軍機大臣等奎昌等奏土爾扈特遊牧人眾流離失所情形困苦等語土爾扈特遊牧被賊侵犯搶掠牲畜財物該遊牧人眾展轉遷徙情形極爲可憫見由烏魯木齊南山移至科布多所屬之哈布塔克等處居住著常順等隨時加意撫恤毋令失所該汗布彥鄂勒哲依圖見在前往各該處收攬人眾其陸續移出者金順奎昌多布沁札木楚常順保英文碩務當設法安置以免滋生事端該汗家屬人眾流離遷移資用缺乏前由烏科兩城借過銀四千兩著卽賞給該汗毋庸在應領京俸下扣還以示體恤將此由五百里各諭令知之○飭各省撥解來年京餉暨內務府經費○戊午諭軍機大臣等曹克忠奏馳抵陝省日期請截畱淮軍一摺據稱該提督於陝州靈寶潼關一帶遇淮軍隊伍聯絡東行詢係劉銘傳飭令先行拔赴徐州所畱二十二營其中員

弁勇丁亦復紛紛告假不絕於途等語前令曹克忠赴陝接統淮軍當諭劉銘傳俟曹克忠抵陝後會商一切將辦理情形會同具奏其餘隊伍帶回徐州駐紮劉銘傳自應與曹克忠面商後再將隊伍分別撤留乃該提督迫不及待遽將各隊遣撤且並未先行奏明殊屬輕率見在所留各營是否一律精壯著責成劉銘傳認真挑選足額不得以疲弱充數致難得力甘肅轉運艱難曹克忠統軍前進隊伍亦不宜過多且肅州地方見有左宗棠所派提督徐占彪統帶十二營前往駐紮曹克忠抵肅後亦可聯絡布置自不必將淮軍全行截留該提督見已由西安馳赴乾州著卽與劉銘傳籌商一切接統該軍剋期西進劉銘傳前奏擬分配馬步二十營交曹克忠接統此次曹克忠摺內稱分撥二十二營因何不符之處著劉銘傳曹克忠查明具奏見在拔赴徐州之淮軍各隊

曾國藩務當督飭認真訓練將來曹克忠所統各營弁兵內如有缺額及不能得力者卽可在徐州各營內續行挑補著曾國藩李鴻章隨時咨商辦理將此由五百里諭知曾國藩李鴻章劉銘傳並傳諭曹克忠知之○諭劉嶽昭岑毓英奏官軍疊破賊壘收復夷寨一摺臨安府屬之館驛等處賊巢見經岑毓英督兵進剿已將五山夷寨收復並分剿婁兮田心曰者鄉賊匪脅從各夷寨紛紛反正賊勢已孤卽著劉嶽昭岑毓英飭令何秀林等督率前敵官軍乘勝進攻先將館驛賊巢攻拔一面分兵圍剿各處賊壘以期迅掃逆氛其反正各夷寨務當飭令各員弁會同地方官隨時稽查妥爲安撫毋令再生事端將此由五百里各諭令知之○予雲南陣亡經歷羅熙藻祭葬世職○庚申直隸豐甯土匪胡良珠等肆擾捕獲伏誅○辛酉命刑部右侍郎常恩工部左侍郎童華

赴熱河查辦事件○壬戌改山東福山縣煙臺巡檢爲繁缺臨清
州王家淺巡檢爲簡缺○癸亥諭軍機大臣等前因已革提督李
世忠有人參奏招集叛黨謀爲不軌諭令曾國藩查奏茲據奏稱
李世忠居家謀利在所不免而於新築圩寨添製槍械結納亡命
等情飭查並無實據等語李世忠見在既無叛逆情迹朝廷不爲
已甚仍著該督隨時訪察儻有不法情事卽行密速具奏將此密
諭知之○諭各省督撫截汰營勇酌撤釐卡○允曾國藩奏本年
江北冬漕仍辦河運○予湖北殉難通判沈耀鋆建祠○乙丑諭
內閣蘇鳳文奏廣西南甯府知府景雲前赴新任取道江北該員
熟悉河務請暫畱差遣等語河道事宜非軍營要務可比景雲係
見任人員該漕督請暫畱差遣之處與例不合所請著不准行○
諭喬松年迅堵侯家林決口○添設順天府捕盜中營千總把總

各一經制外委二額外外委一馬步兵六十六名歸治中營轄○
己已諭內閣李瀚章奏遵旨前赴湖南查明地方文武辦理匪徒
情形一摺據稱道州土匪滋事已於上年十月辦結武岡州自肇
獲教匪蕭逢源等後地方安堵本年六月內並未圍城亦無匪首
施玉山聚眾潛匿等情舉人陳景滄深悉匪首劉道美等結會謀
逆報官捕獲匪黨正法並將劉道美之父劉家實收禁劉道美等
遂挾嫌將陳景滄父子殺害撲犯龍陽益陽縣城並非陳景滄激
變所致陳景滄亦無誣殺劉秀芝之事劉崐與陳景滄並無姻親
至李光燦一軍剿匪甚爲得力洞庭西湖一帶查無大頭目劉鴻
怡在彼潛藏及肆用洪逆僞記等情事羊瀛所帶團勇不諳紀律
未及一月卽經調回裁撤劉崐於雷伯旺及藍溪匪徒劫殺兩案
實已獲犯懲辦等語劉崐辦理會匪滋事情形既據李瀚章查明

尙無粉飾貽誤惟於雷伯旺及藍溪搶劫殺人兩案並不明晰奏報僅於清查逸匪摺內彙奏實屬疏略劉崐著交部議處已革益陽縣知縣黃應誥拏辦會匪未能迅獲正犯僅將犯屬收禁致被匪眾劫獄陷城前已革職永不敘用著發往軍臺效力贖罪候補參將羊瀛帶練勦賊約束不嚴咎無可辭著以守備降補○加賞通州王恕園等處賑米四百石○庚午子山東陣亡提督曹萬元等祭葬世職○辛未諭戶部籌撥庫倫軍餉○子先儒張履祥從祀 文廟○癸酉諭軍機大臣等王文韶奏援黔各軍攻克賊巢見圖會合黔軍進剿一摺湖南援黔各軍自攻克螃蟹賊巢後席賈田一軍勦辦清水南岸將黃茅嶺一帶賊巢攻破北岸鄧善燮一軍埽蕩而前進紮甕谷隴擊敗援賊軍威已振亟宜乘此聲勢將清江兩岸一律埽平見在周達武前軍已抵黃平與甕谷隴之

軍可期聯絡王文韶已飭令龔繼昌等分營北渡會同鄧善燮進攻黃飄白堡著曾璧光檄飭各營協力夾攻務將清平黃平一帶積匪盡數鏟除疏通驛路俟此路平定再勦開懷肅清丹江凱里著曾璧光王文韶分檄黔楚各軍隨時相機合勦以竟全功將此由五百里諭知曾璧光並傳諭周達武王文韶知之○甲戌諭軍機大臣等都興阿等奏孤山官軍會勦賊匪獲勝一招匪首李汶生等於本年十月間竄擾北井子街及龍王廟等處都興阿等派令馬步各隊分投勦擊斃匪多名並將李汶生及夥犯華復松等拏獲正法餘匪逃散孤山地方賴以稍安卽著都興阿清凱檄令春岱等督率馬步各隊迅將逸匪悉數兜拏務絕根株毋畱餘孽此次勦賊出力各員著准其擇尤保奏毋許冒濫將此各諭令知之○諭文彬奏遵旨趕緊籌堵侯家林缺口一摺山東侯家林決

口關繫運道民生亟應及早堵塞不容稍涉遲緩文彬等已籌撥銀三十萬兩遴委妥員帶赴工次會同地方官購辦料物著喬松年迅速委員馳抵東省並飭原估委員先行星夜赴東務卽刻日興工於來年春漲以前辦理完竣並將淤墊運道一律疏濬毋稍延誤該河督等務當督飭在工各員實力籌辦總期工料堅實餉不虛糜以衛居民而利漕運其蘇鳳文前奏臨清建牕等事宜仍著蘇鳳文喬松年丁寶楨文彬悉心會商奏明辦理將此由四百里諭知蘇鳳文喬松年丁寶楨並傳諭文彬知之○子甘肅殉難總兵官石紹文祭葬世職○丙子諭內閣前因劉銘傳奏病難速痊未能前赴肅州當經降旨賞假三箇月准其回籍調理其所部淮軍卽令曹克忠赴陝接統並恐兵將或不相習復諭該提督俟曹克忠抵陝後酌商妥協將辦理情形會同具奏乃據曹克忠先

後陳奏該提督行抵陝州一帶卽遇淮軍所撤隊伍絡驛東行卽所畱各營其員弁勇丁亦復紛紛告假不絕於途迨抵乾州後劉銘傳各營弁勇清冊移交卽日將交替情形主檄會奏劉銘傳亦卽星夜遄發查新接各營疲弱缺額及領餉告假者爲數甚多均須一律募補辦理實形掣肘各等語劉銘傳於軍旅重事自應恪遵諭旨與曹克忠會商妥協再將隊伍分別撤畱乃竟迫不及待將各隊遣撤又不先行奏明且所交各營亦多疲弱缺額實屬措置乖方不顧大局前直隸提督劉銘傳著交部嚴加議處以示懲儆○諭軍機大臣等曹克忠奏接管淮軍辦理掣肘情形請招募勇丁添補缺額各摺片曹克忠接統淮軍曾諭劉銘傳與之會商務將一切駕馭機宜籌畫妥協再行回籍原以新舊交替之際將士不習變故易生劉銘傳自應恪遵諭旨力顧大局方爲不負

委任乃曹克忠行抵乾州銘軍已有遣去者得力之統領營官悉
皆資遣並將精良器械悉行運回劉銘傳僅畱隨身小隊一晤而
別各局早經裁撤准軍一切章程未據交出復貼發餉遣勇告示
縱令營勇假歸各營因索餉滋鬧幾致不測等語前據王家璧奏
劉銘傳軍伍多虛性情驕蹇朝廷念其前功未加責問所以寬容
而優待之者不爲不至若如曹克忠所奏各情是劉銘傳止便私
圖罔顧公事幾致貽誤大局已明降諭旨將劉銘傳交部嚴加議
處以示懲儆見在各營缺額甚多亟須募補著李鴻章迅將需用
經費覈定撥交曹克忠以便該提督派員分赴楚皖招募並將曹
克忠各營餉需寬爲籌備俾免缺乏曹克忠務將各營力加整頓
相機駕馭拊循一俟布置就緒卽行拔隊西進其撤回徐州駐紮
各隊實係若干卽著留國藩查明督飭訓練毋令日久生懈曹克

忠摺片單各一件王家璧片一件均著鈔給曾國藩李鴻章閱看
將此由五百里諭知曾國藩李鴻章並傳諭曹克忠知之○予陝
西同州傷亡副將李家安等祭葬世職○丁丑諭軍機大臣等瑞
麟奏剿辦香山等處匪巢情形一摺廣東香山等縣交界之趙家
圍地方近有匪徒麇聚焚搶勒贖經瑞麟派令戴朝佐等督帶兵
勇水陸進剿將各處匪巢焚毀賊眾遁向赤溪官軍跟追搜捕拏
獲匪首曾大鵝幅等多名見將兵勇調回責成地方文武緝拏餘
匪務將在逃匪黨悉數弋獲毋令漏網此次出力各員并准其擇
尤請獎另片奏營員擅自招撫私放要犯請革職審辦等語署赤
溪協都司王熊彪隨剿趙家圍等處股匪乃敢擅議招撫屬令各
營暫緩進兵並將已獲要犯曾大鵝幅朱秋潰私行釋放實屬膽
大妄爲且恐有通賊賄縱情弊王熊彪著卽革職嚴審究辦至曾

大鵝幅朱秋潰二犯是否釋放後仍行拏獲抑尙在逃著瑞麟明
晰具奏將此諭令知之尋奏要犯曾大鵝幅業已捕獲正法得旨
卽著檄飭各營並地方文武嚴拏朱秋潰務獲毋任倖逃法網○
諭景廉奏馳抵巴里坤籌辦軍糧催調後路各營拔隊並西路軍
情各一摺景廉於十月初七日馳抵巴里坤與伊勒屯商辦進兵
事宜惟沙漠瘠區屢遭兵燹採買軍糧萬分棘手且各省欠解之
款迄無起運明文所有糧石價銀及勇丁月餉等項見均無款可
給自應迅籌接濟除西征糧臺撥款業經奏報起解外其戶部續
撥之十萬兩及各省欠餉協餉卽著戶部詳晰查明迅速咨催飭
由察哈爾運解至景廉軍營以應急需至塞外用兵籌糧難於籌
餉見在巴里坤一帶糧石無多將來大軍銜接西進更難倉卒立
辦著李鴻章定安富勒琿鮑源深豫行籌款分飭口北歸綏兩道

廣爲採辦麪斤隨時運送景廉所請烏里雅蘇台設立轉運糧臺或由喀爾喀蒙古遊牧撥用駝隻或官爲發價雇覓商駝之處並著金順奎昌多布沁札木楚竭力籌辦以濟軍食蒙兵素本怯弱且布彥鄂勒哲依圖疊據文頤奏稱其人未可深恃著景廉妥爲駕馭毋致貽誤至綏來縣西湖地方居民歸附俄國雖係傳聞之詞惟該處久無官長約束難免見異思遷景廉務飭派往委員設法拊循毋令渙散景廉僅帶馬步兩營兵力太單著文麟迅撥數營駐紮安敦一帶以便景廉所部張玉春等營陸續進發以振軍威成祿懷遵前旨先派數營扼紮嘉峪關一俟徐占彪抵肅後該提督卽當拔隊出關毋稍遲滯徐占彪見抵何處計期早應到肅著左宗棠催令星速到防俾成祿得以早日成行西路軍情仍著景廉伊勒屯隨時偵探相機妥辦將此由六百里各諭令知之○

戊寅諭軍機大臣等榮全奏帶兵西進安設臺站豫籌西進機宜請飭烏科兩城速籌轉運探悉伊犁情形各摺片榮全已於十一月初六日行抵霍博克賽里擬於烏梁海一帶安設臺站並於烏梁海迤西一體設臺直抵塔爾巴哈台所籌尙妥所有科城兩屬自和碩特起至布倫托海應設十二臺著奎昌多布沁札木楚常順保英妥速籌辦常順保英未到任以前仍著文碩速爲經理不得以交卸在卽稍涉推諉致誤大局全順到任後並著奎昌等詳細告知一體遵辦其哈爾巴哈台所屬各臺著榮全富和會商辦理榮全卽當剋期進發毋稍延緩托倫布等早經出京俟行抵烏里雅蘇台時著奎昌等傳知該員等迅速前進毋稍濡滯吉林馬隊已據杜嘎爾奏報於十二月初六日由克克伊爾根地方分起前進若再令另行挑選轉致耽延卽著榮全催令訥蘇肯管帶此

起官兵星速進行藉資策應榮全見由霍博克賽里西進去烏科
兩城較遠所有應解餉銀及軍火等項著奎昌多布沁札木楚常
順保英文順遜派委員飛速押運俾無遲滯俄人喀勒帕科斯克
欲與榮全在那丹木克議事著榮全行抵該處後酌度情形相機
籌辦俄人有明年進兵東路之說尤應先事防維榮全豫籌挑選
索倫等項人眾會合鄉團規取瑪納斯等處先斷東面之路著屆
時妥爲籌畫謀定後動毋稍疏虞轉瞬春融事機緊迫景廉務當
催齊張玉春等營鼓行而西會合沙山子等處團勇掃蕩逆氛規
取烏魯木齊等城並與榮全隨時咨商以期聲息相通藉資聯絡
榮全安設臺站摺著鈔給奎昌等閱看其探悉伊犁情形片著鈔
給景廉閱看將此由六百里各諭令知之○庚辰諭內閣內閣學
士翁同龢之母許氏秉性淑慎教子有方今以疾終深堪軫愷著

加恩賜祭一壇賞銀二千兩經理喪事由廣儲司給發用示優禮

儒臣推恩賢母至意○翁同龢丁憂以邵亨豫署陝西巡撫

由倉場侍

署○壬午命翰林院侍讀林天齡在弘德殿行走○諭李鶴年等

迅解巴哈兩城欠餉○諭戶部籌撥科布多軍餉○癸未以裕祭

太廟 上前期親詣行禮○諭軍機大臣等成祿奏截剿肅州

逆匪及關外防堵情形並請飭劉銘傳派兵協剿各摺片肅州回
匪攻撲臨水營盤經明春等堵剿獲勝竄犯敦煌之賊亦經李天
和協力擊退惟成祿所奏尙是七八月間之事數月以來賊勢軍
情更不知若何左宗棠前派徐占彪一軍早經啟程尙未奏報到
肅日期著卽查明此軍見已行抵何處催令星速前進毋稍遷延
前據文麟奏關外賊勢甚重疊經諭令成祿先派數營馳赴嘉峪
關扼紮遏賊出關之路仍著成祿迅速調派一俟徐占彪到肅該

提督卽當懷遵前旨拔隊出關與景廉等會籌勦辦劉銘傳駐陝各營業已撤回徐州其曹克忠接統之馬步二十二營尙須募補足額有需時日著曹克忠酌量情形先就見有之兵部署啟程其募補勇丁隨後再行歸隊仍於經過蘭州時與穆圖善會商布置毋誤機宜將此由六百里諭知左宗棠穆圖善成祿並傳諭曹克忠知之○甲申以張樹聲爲漕運總督李慶翱爲山西布政使蔣凝學爲山西按察使由甘肅安肅道遷○調李文敏爲江西按察使俊達爲廣東按察使○乙酉予貴州陣亡知府李斌等祭葬世職○是月蠲免兩浙仁和等六場未墾地畝本年竈課蠲緩江蘇高郵等三十五州廳縣被水被旱太倉等二十九州廳縣蘇州等五衛水旱暨未墾田畝新舊額賦雜課湖南澧州等九州縣暨岳州衛被水新舊額賦雜課陝西隴州等三十七州縣被災被擾積欠額賦

河南禹州等七十五州廳縣被水新舊額賦並賑河內等縣災民
一月口糧緩徵湖北沔陽等二十五州縣武昌等二衛被水新舊
錢糧雜課兩淮富安等十四場歛收舊欠錢糧山西平遙等二縣
被水舊欠額賦暨民借倉穀山東濟甯州被水本年額賦暨同治
十一年上忙錢糧○是歲朝鮮琉球日本越南入貢○會計天下
民穀數除江蘇安徽福建雲南廣西陝西甘肅未經冊報外奉天
等省通共大小男婦二萬七千二百三十五萬四千八百三十一
名口存倉米穀二百八十四萬一百三十七石二斗九合三勺